

四庫全書

集部

欽定四庫全書

唐詩紀事卷六十六

宋 計敏夫 撰

馮涓

盧嗣立

李質

姚巖傑

王璘

嚴郭

陳標

崔安潛

盧發

錢珣

盧駢

嚴憚

王渙

張曙

翁綬

戴司顏

孫定

趙牧

盧注

鄭愚

王鐔

陳珣

馮涓

涓初除京兆府參軍恩地杜相審權有江西之拜制未
出召涓密語延辟之命戒勿洩涓漏其言於友人鄭寬
寬尋捧刺詣賀杜遂鄙涓淺薄不預初選及庶車發日
涓候別於長樂杜長揖曰勉旃後分符眉州不得之任
在西川重圍中跼蹐於陳田之間羈愁六年徒步糊口
著懷秦賦有南冠龍吟等集皆傷蹭蹬也集有蜀馱引
其要云昂藏大步蠶叢國曲頸微伸高九尺卓女窺牕

莫我知嚴仙據按何曾識又題支機石云不隨俗物皆
成土只待良時却補天惜知己之不遇也

涓字信之信都人大中初舉進士登宏詞科時危隱商
山十年昭宗以爲眉州刺史陳田拒命涓棄郡於成都
墨池灌園自給王建以爲翰林學士雖詼諧傲物而多
有補益卒於蜀

盧嗣立

望九華山云九華深翠落軒楹迥眺澄江氣象明不遇

陰霾孤岫隱正當寒日衆峰呈坐觀風雪銷煩思惜別
煙嵐駐曉行得路歸山期早訣夜來潛已告精誠

嗣立登會昌進士第

李質

質字公幹襄陽人應舉無成有親在衡湘往謁焉泝流
至湓城豫章逐師捨舟由武寧而反會草寇殺其宰倉
惶前去得日觀宿東房有酒數缸甚美遂携一壺上樓
酌之因吟曰曾入桃溪路仙源信少雙洞霞颺素練蘚

壁畫陰窻古木愁撐月危峰欲墮江自吟空向寂誰共
倒秋缸吟畢如有人言曰土主尚書寓宿在此

質登第後二十年廉察豫章時大中十二年也出科名
分定錄

姚巖傑

巖傑梁國公元崇裔孫嘗以詩酒放遊江左乾符中顏
標典藩鞠場亭宇初創命巖傑紀其事文成粲然標欲
刊去一二字巖傑大怒標遂仆其碑巖傑以一篇紀之

曰爲報顏公識我麼我心唯只與天和眼前俗物關情
少醉後青山入意多田子莫嫌彈鋏恨甯生休唱飯牛
歌聖朝若爲蒼生計也合公車到薜蘿

盧肇牧歙州巖傑在婺源先以著述寄肇肇已知其人
辭以兵火之後郡中凋弊無以迎逢大賢巖傑復以長
牋激之肇不得已輟所乘馬迎至郡齋館穀如公卿禮
既而日肆傲睨肇常以篇詠詫於巖傑曰明月照巴山
巖傑笑曰明月照天下奈何獨巴山耶子發漸不得意

無何會於江亭時蒯希逸在席肇改令曰目前取一聯
象令主曰遠望漁舟不濶尺八巖傑遽飲酒一器凭欄
嘔噦須臾即席還令曰凭欄一吐已覺空喉有集二十
卷目曰象溪子中和末豫章大亂巖傑病死

王璘

長沙日試萬言王璘詞學富贍崔詹事廉問表薦於朝
先試之使解璘請十書吏皆給筆札璘口授十吏筆不
停綴首題黃河賦三千字復爲鳥散餘花落詩二十首

援筆而就時忽風雨暴至數幅爲回飈所卷泥滓沾漬
璘曰勿取但將紙來復縱筆一揮斯須復十餘篇矣時
未亭午已七千餘言時路嵩方當鈞軸遣一介召之璘
曰請俟見帝嵩大怒亟命奏廢萬言科璘杖策而歸放
曠盃酒間雖屠沽無間然矣璘與李群玉相遇獄麓寺
群玉曰公何許人璘曰日試萬言王璘群玉待之甚淺
曰請與公聯句可乎璘曰唯子之命群玉破題而授之
不記其詞璘略不佇思繼之曰芍藥花開菩薩面櫻欄葉散

野人頭群玉遂屈崔詹事遺璘夾纈數匹璘翌日以作
中單襜褕衣之

嚴郭

賦百舌鳥云此禽輕巧少同倫我聽長疑舌滿身星未
沒河先報曉柳猶粘雪便迎春頻嫌海燕巢難定却訝
林鶯語不真莫倚春風便多事玉樓還有晏眠人

陳標

標贈元和十三年登第進士曰春官南院粉牆東地色

初分月色紅文字一千重馬擁喜歡三十二人同眼看
魚變辭凡水心逐鷺飛出瑞風莫恠雲泥從此別摠曾
惆悵去年中

標詠蜀葵花云能共牡丹爭幾許得人嫌處是花多韋
絢曰鶴與鷓鴣皆胎化而人以鶴爲仙禽蓋鶴難見鷓
鴣易見貴耳而賤目也遂誦標蜀葵花詩以況之

啄木謠云丁丁向晚急還稀啄徧庭槐未肯歸終日與
君除蠹害莫嫌無事不平飛寄友人云杜甫在時貪入

蜀孟郊生處却歸秦如今始會麻姑意借問山川與後人右張為取二詩作主客圖

標終侍御史長慶二年進士也

崔安潛

何澤韶陽曲江人也父鼎容管經略有文稱澤乾寧中隨計至三峰行在永樂崔公安潛即澤之同年文人也聞澤來乃以一絕報之曰四十九年前及第同年唯有老夫存今日殷勤訪吾子穩將髻鬢上龍門時主文與

奪未分又會相庭有所阻

時崔相公盾恃權即永樂猶子也

因之敗於

垂成後漂泊關外梁太祖受禪澤假廣南幕職入貢勅

賜及第

世謂崔魏公鉉好食新饍頭杜幽公悰每早食饋飯乾

脯崔侍中安潜看鬪牛李衛公曰吾喜見未聞新書策

安潜字進之累爲西川平盧等節度拜侍中自中令鎮

荆南

盧發

杜蘊廉問長沙發爲從事往致聘焉發酒酣傲睨公公
因改著詞令曰十姓胡中第六胡也曾金闕掌洪爐少
年從事誇門地莫向樽前喜氣麤盧荅曰十姓胡中第
六胡文章官職勝崔盧暫來關外分憂寄不稱賓筵喜
氣麤公極歡而罷

錢珣

字端文吏部尚書徽之子善文辭宰相王溥薦知制誥
進中書舍人溥得罪珣貶撫州司馬

珣客舍寓懷云灑灑灘聲晚霽時客亭風袖半披垂野
雲行止誰相待明月襟懷祇自知無伴偶吟溪上路有
花偷笑臘前枝牽情景物潛惆悵忽似傷春遠別離

春恨三首云負罪將軍在北朝秦淮芳草綠迢迢高臺
愛妾魂銷盡始得邛遲爲一招

久戍臨洮報未歸篋香銷盡別時衣身輕願比蘭堦葉
萬里還尋塞草飛

永巷頻聞小苑遊舊思如淚亦難收君前願報新顏色

團扇須防白露秋

蜀國偶題云忽憶明皇西幸時
暗傷潛恨竟誰知
佩蘭應語宮臣道
莫向金盤進荔枝

送王郎中云惜別遠相送
却成惆悵多
獨歸迴首處
爭那暮山何

未展芭蕉云冷燭無煙
綠蠟乾芳心猶卷怯春寒
一緘書劄藏何事
會被東風暗拆看

盧駢

盧駢員外一日休于青龍僧舍詞氣悽慘暮歸促命筆題南榴曰壽天雖云命榮枯亦太偏不知雷氏劍何處更衝天題畢草草而去涉旬卒駢咸通進士也

嚴憚

皮日休傷嚴子重序云余爲童在鄉校時簡上抄杜舍人牧之集見有與進士嚴憚詩後至吳一日有客曰嚴某余忘其名久矣遽懷文見造於是樂甚觀其所爲工於七字往往有清便柔媚時可軼駿於常軌其佳者

曰春光冉冉歸何處更向花前把一杯盡日問花花不語爲誰零落爲誰開余羨之諷而未嘗怠生舉進士亦十餘計偕余方寬之謂終有得於時也未幾歸吳興後

兩月

咸通十一年也

雪人至云生以疾亡於所居矣噫生徒以

詞聞於士大夫竟不名而逝豈止此而堙沒耶江湖間多美材士君子苟樂退而有文者死無不爲時惜可勝言耶於是哭而爲詩魯望生之友也嘗爲我作詩云十哭都門榜上塵蓋棺終是五湖人生前有敵唯丹桂沒

後無家祇白蘋箬下斬新醒處月江南依舊詠來春知

君精爽應無盡必在鄴都頌帝晨

項梁成鄴都宮頌
曰紂絕慄帝晨

陸魯望云嚴子重以詩遊於名勝間舊矣余晚於江南
相遇甚樂不幸且沒襲美作詩序而弔之其名真不朽
矣又何戚其死哉余因息悲而爲之和云每值江南日
落春十年詩酒愛逢君芙蓉湖上吟船倚翡翠巖前醉
馬分祇自汀洲連舊業豈無章䟽動遺文猶憐未卜佳
城處更斲要離冢畔雲

王渙 裴贊

大順中王渙自左史拜考功員外同年李德隣自右史
拜小戎趙光胤自補袞拜小儀王拯自小版拜小勳渙
首唱長句感恩上裴公曰青衿七十榜三年建禮含香
次第遷珠彩下連星錯落桂花曾對月嬋娟玉經磨琢
多成器劒拔沉埋更倚天應念銜恩最深者春來爲壽
拜樽前裴公荅曰謬持文柄得時賢粉署清華次第遷
昔歲策名皆健筆今朝稱職並同年各懷器業寧推讓

俱上青霄肯後先何事老夫猶賦詠欲將酬和永留傳
渙字群吉大順二年侍郎裴贄下登第德隣拯光胤皆
同年也

渙惆悵詩云水蛭薄絮鴛鴦綺半夜佳期並枕眠鐘動
紅娘喚歸去對人勻淚拾金鈿

李夫人病已經秋漢武看來不舉頭得所濃華銷歇盡
楚魂湘血一生休

謝家池館花籠月蕭寺房廊竹颭風夜半酒醒憑檻立

所思多在別離中

隋師戰艦欲亡陳國破應難保此身訣別徐郎淚如雨
鑑鸞分後屬何人

七夕瓊筵往事陳
蓼花蓮蒂共傷神
蜀王殿裏三更月
不見驪山私語人

夜寒春病不勝懷
玉瘦花啼萬事乖
薄倖檀郎斷芳信
驚嗟猶夢合歡鞋

嗚咽離聲管吹秋
妾身今日爲君休
齊奴不說平生事

忍看花枝謝玉樓

青絲一絡墮雲鬟金剪刀鳴不忍看持謝君王寄幽怨
可能從此住人間

陳宮興廢事難期三閣空餘綠草基狎客淪亡麗華死
他年江令獨來時

晨肇重來路已迷碧桃花謝武陵溪仙山目斷無尋處
流水潺湲日漸西

少卿降北子卿還朔野離觴慘別顏却到茂陵唯一慟

節毛零落鬢毛斑

夢裏分明入漢宮
覺來燈背錦屏空
紫臺月落關山曉
腸斷君恩信盡工

張曙

張曙崔昭緯中和初同舉相與詣日者問命曙時自負才名籍甚以爲將來狀元崔亦分居其下日者殊不顧曙第目崔曰將來萬全高第曙有愠色日者曰郎君亦及第然須待崔拜相當此時過堂既而曙果不終場昭

緯首冠曙以篇什刺之云千里江山陪驥尾五更風水
失龍麟昨夜浣花溪上雨綠楊芳草爲何人後七年昭
緯爲相曙方登第果於昭緯下過堂杜荀鶴同年生也
酬曙詩云天上書名天下傳引來齊到玉皇前大仙錄
後頭無雪至藥成來竈絕煙笑躡紫雲金作闕夢拋塵
世鐵爲船九華山叟驚凡骨同到蓬萊豈偶然

翁綬

詠酒云逃暑迎春復送秋無非綠蟻滿盃浮百年莫惜

千回醉一盞能消萬古愁幾爲芳菲眠細草曾因雨雪
上高樓平生名利關身者不識狂歌到白頭綬登咸通
進士第

戴司顏

景福中江西節度使鍾傳遣僧從約進法華經一千部
上待之甚厚恩屋有加宣從約入內賜齋面錫紫衣一
副將行太常博士戴司顏以詩贈行略曰遠來朝鳳闕
歸去戀元侯時吳子華任中諫司顏仰公之名志在屬

和以爲從約之資融覽之附掌大笑曰這阿師更不要見便拽出得其承奉如此

司顏登大順進士第

孫定

定字志元涪州大戎之族子長於儲定數舉矣儲方欲就貢訪於定定諺曰子儀表堂堂好將軍材何必以科第爲資儲銜之後儲貴達未嘗言定之長晚年喪志放意杯酒景福二年下第遊京西開遠門醉中走筆寄儲

詩曰行行血淚洒塵襟事逐東流渭水深秋跨蹇驢風
尚緊靜投孤店日初沉一枝猶挂東堂夢千里空馳北
巷心明月悲歌又前去滿城煙樹噪春禽定詩歌千餘
首多委於兵火竟無成而卒

趙牧

牧不知何許人也大中咸通中數李長吉爲短歌對酒
曰雲翁耕扶桑種黍養日烏手按六十花甲子循環落
落如弄珠長繩繫日未是愚有翁臨鏡捋白鬚飢魂弔

骨吟古書馮唐八十無高車人生如雲在須臾何乃自
苦八尺驅裂衣換酒且爲娛勸君朝飲一瓢夜飲一壺
杞天崩雷騰騰紂非舜是何足憑桐君桂父豈勝我醉
裏白龍多上昇菖蒲花開魚尾定金丹始可延君命其
餘尤尚輕巧詞多不載

唐詩自咸通而下不足觀矣亂世之音怨以怒亡國之
音哀以思氣喪而語偷聲煩而調急甚者忿目褊吻如
戟手交罵大抵王化習俗上下俱喪而心聲隨之不獨

士子之罪也其來有源矣司空圖輩傷時思古退已避
禍清音泠然如世外道人所謂變而不失正者也余故
盡取晚唐之作庶知律詩末伎初若虛文可以知治之
盛衰

盧注

注門族甲天下因宦家于荆南舉進士二十上不第嘗
賦詩曰惆悵興亡繫綺羅世人猶自選青娥越王解破
夫差國一箇西施也太多晚年失意賦酒胡子一篇云

同心相遇思同歡
擎出酒胡當玉盤
盤中餽飢不自定
四座清賓注意看
可亦不在心
否亦不在面
徇客隨時
自圓轉酒胡
五藏屬他人
十分亦是無情
勸尔不耕亦
不飢
尔不蚕亦有衣
有眼不能分
黼黻有口不能明
是非
鼻何尖
眼何碧
儀形本非天地力
雕鐫匠意苦多端
翠帽朱衫巧粧飾
長安斗酒十千酤
劉伶平生爲酒徒
劉伶虛向酒中死
不得酒池中拍浮
酒胡一滴不入眼
空令酒胡名酒胡

鄭愚

咸通中愚自禮部侍郎除鎮南海時崔魏公在京南愚
著錦襖子半臂袖卷謁文公大奇之會夜飲更衣賓從
間竊謂公曰此應是慚其不稱既而復易紅錦尤加煥
麗衆莫能測愚爲進士時未嘗以文章及魏公門至是
乃贊所業崔歎賞曰真銷得錦半臂矣愚作大瀉虛祐
師銘云湖之南湘之西山太瀉深無蹊虎已嘯猿又啼
雨撼撼風淒淒高入雲不可梯雖欲去誰與推彼上人

忘其身一宴坐千餘旬去無踈來無親夷積阻架嶙峋
棟宇成供養陳我不知徒自勤物之生孰無情識好惡
知寵驚真物藏百慮呈隨婉轉任崢嶸雲糊天月不明
金在鑛火收螢我不知天地先無首尾功用全六度備
萬行圓常自隨在畔邊要即用長目前非艱難不幽玄
哀世徒苦馳驅覓作佛何其愚算海沙登迷廬眠喘喘
心區區見得失繫榮枯棄知覺求形模近似遠易復難
但無事心即安少思慮簡悲歡淨蕩蕩圓團團更無物

不勞看聽他語被人謾生必死理之常榮必悴非改張
造衆罪欺心王作少福須天堂善惡報正身當自結果
無人將心作惡口脫空欺木石嚇盲聾牛阿旁鬼五通
專覷捕見西東禁定住陽朦朧與作爲事不同最上乘
有想基無結淨本無爲人不見自心知動便是莫狐疑
直下說沒文詞識此意見吾師愚廣州人唐末爲相

王鐐

王鐐富有詞學數舉未捷門生盧肇等公薦於春官云

同盟不嗣賢者受譏相子負薪優臣致誚乃旌繇嘉句
曰擊石易得火扣人難得心今日朱門者曾恨朱門深
聲藹然果擢上第繇登咸通進士第宰相王播之弟炎
生二子鐸繇鐸相僖宗繇累官至汝州刺史王仙芝陷
郡城繇貶韶州司馬終太子賓客

陳叟

鴻之子也咸通中佐廉使郭常侍銓于徐性耿介有所
不合挈家居茅山平居焚香習禪妻子罕面寄居蘭若

自述檀經三卷臨行留一章與其僧云行若獨輪車常
畏大道覆止若圓底器常恐他物觸行止既如此安得
不離俗乾符中弟璉佐薛能幕於徐琫自丹陽掉小舟
與相見能重其人延入城不可曰某已有誓不入公門
矣薛移舟赴之話道永日不宿而去

唐詩紀事卷六十六

欽定四庫全書

唐詩紀事卷六十七

宋 計敏夫 撰

李嶸

袁皓

歐陽澥

徐振

李濤

王貞白

王祝

劉谷

李昌鄴

王滌

王碩

陸貞洞

李縞

高衢

張綺

韋氷

薛昭緯

鄭合敬

許晝

程賀

裴鉶

張孜

顧雲

李昭象

李嶸

李蔚鎮江淮有李嶸者獻詩云鷄樹煙含瑞氣凝鳳池
波待玉山澄國人久倚東闕望擬築沙堤到廣陵後果
入相

袁皓

皓書師曠廟文云吟篁怨桐天其聲乎鏘石鏗金天其
文乎擊革鳴絲天其暢乎匏土之韻天其和乎天有至
音寄斯八物先生不生斯音鬱鬱先生既生斯音在律

嗚呼先生之耳時可求也先生之心不可得也大哉樂
乎先生之無神乎愚固狂而不可攄先生之有神乎愚
堅誠而乞其圖先生之耳有神乎化爲天下之耳先生
之心有神乎化爲天下之心古者可以舒於今然後家
家知舜琴

羅隱贈袁侍御詩云風塵慚上品才業愧明時千里笑
蓉幕何由話所思

皓宜春人咸通進士龍紀集賢殿圖書使自稱碧池處

士

僖宗狩蜀皓時爲倉部員外采李晟功烈爲興元聖功
錄徧賜諸將表勵之

皓初登第過岳陽悅妓藥珠以詩寄嚴使君曰得意東
歸過岳陽桂枝香惹藥珠香也知暮雨生巫峽爭奈朝
雲屬楚王萬恨只憑期尅手寸心唯繫別離腸南亭晏
罷笙歌散回首煙波路渺茫嚴君以妓贈之皓及第後
作云金榜高懸姓字真分明折得一枝春蓬瀛乍接神

仙侶江海迴思耕釣人九萬搏扶排羽翼十年辛苦涉
風塵昇平時節逢公道不覺龍門是嶮津

歐陽澥

閩川歐陽澥者四門博士詹之孫也澥娶婦經旬而辭
赴舉久不還家詩云黃菊離家十四年又云離家已是
夢松年又云落日望鄉處何人知客情自憐十八年之
帝鄉未遇知己也亦爲燕詩以獻主司鄭愚曰翩翩雙
鷺盡堂開送古迎今幾萬迴長向春秋社前後爲誰歸

去爲誰來澥出入場中僅二十年善和韋中令在閣下
澥即行卷及門凡十餘載未嘗一面而澥慶弔不虧韋
公雖不言而心念其人和初公隨駕至蜀命相時澥
寓居漢南公以書令襄帥劉巨容俾澥計偕巨容得書
大喜待以厚禮首薦之撰日遵路無何一夕心痛而卒
巨容因籍澥荅書呈於公公覽之憮然因曰十年不見
灼然不錯

徐振

雷塘云九重城闕悲涼盡一聚園林怨恨長花憶所爲
猶自笑草知無道更應荒詩名占得風流在酒興催教
運祚亡若問皇天惆悵事只應斜日照雷塘

古意云擾擾都城曉又昏六街車馬五侯門箕山渭水
空明月可是巢由絕子孫右二詩韋莊取爲又元集

李濤

李濤長沙人也篇詠甚著如水聲長在耳山色不離門
又掃地樹留影拂床琴有聲又落日長安道秋槐滿地

花皆鱸炙人口溫飛卿任太學博士主秋試濤與衛丹
張邵等詩賦皆榜於都堂

王貞白

貞白唐末大播詩名御溝爲卷首云一派御溝水綠槐
相蔭清此波涵帝澤無處濯塵纓鳥道來雖險龍池到
自平朝宗心本切願向急流傾自謂冠絕無瑕呈僧貫
休休曰甚好只是剩一字貞白揚袂而去休曰此公思
敏書一字於掌中逡巡貞白迴忻然曰已得一字云此

中涵帝澤休將掌中字示之一同天祐年中內試貞白
扎翰狼藉帝覽拂下玉案有黃門奏此舉人有詩名御
批曰粗通放

貞白寄鄭谷曰五百首新詩緘封寄與誰祇憑夫子鑒
不要俗人知火鼠重收布水蠶乍吐絲直須天上手裁
作領巾披

僧貫休送貞白重試及第東歸云心苦酬心了東歸謝
所知可憐經試者如折兩三枝雨毒逢花少山多愛馬

遲此行三可羨正值倒戈時

江西解圍

昭宗皇帝頗爲寒進

開路崔合州凝典貢舉但是子弟無問文章其間屈人不少孤寒中唯程宴黃滔擅場之外如貞白張嬪詩題觀文古風皆臻前輩之閫闕者也

貞白字有道

王祝

會昌時有題三鄉者曰余本若耶溪東與同志者二三紉蘭佩蕙每貪幽閑之境翫花光於松月之亭竟畫綿

宵往往忘倦泊乎初筭至于五換星霜矣自後不得已
從良人西入函關寓居晉昌里第其居迥絕囂塵花木
叢翠東西隣二佛宮皆上國勝遊之最伺其閑寂因遊
覽焉亦不辜一時之風月也不意良人已矣邈然無依
帝里芳春光景東邁涉澹水厯渭川背終南陟太華經
虢略抵陝郊揖嘉祥之清流面女兒之蒼翠凡經過之
所皆曩昔譙笑之地銜冤茹歎舉目魂銷雖殘骸尚存
而精爽都失假使潘岳復生無以悼其幽思也遂命筆

聊題終不能滌其懷抱絕筆慟哭而東時會昌壬戌歲仲春十九日也詩曰昔逐良人西入關良人身歿妾空還謝娘衛女不相待爲雨爲雲歸舊山和者十人祝和三鄉詩云女兒山前嵐氣低佳人留恨此中題不知雲雨歸何處空使王孫見即迷

祝字不耀名家子唐末爲給事中巢寇前典常州既亂寄江湖甚有時望及詔召經陝時王拱爲帥凶暴以厚禮降接願居子姪之末祝堅不許拱怒罷宴命將吏速

請離館害于途悉投其家于黃河時朝廷多故捨而不
問祝一子行至襄州亦無故投井而卒

劉谷

三鄉詩云蘭蕙芬芳見玉姿路傍花笑景遲遲
下無窮意併在三鄉惜別時

李暹送谷詩云村樓西路雪初晴雲暖沙乾馬足輕寒
澗渡頭芳草色新梅嶺外鷓鴣聲郵亭已送輕車發山
館誰將候火迎落日千峰轉迢遞知君回首望高城又

和谷除夜見寄云灞上家殊遠爐前酒易曛劉郎亦多
恨時憶故山雲

李昌鄴

三鄉詩云紅粉蕭娘手自題分明幽怨發雲閨不應更
學文君去泣向殘花歸剡溪

王滌

三鄉詩云浣沙遊女出關東舊跡新詞一夢中槐陌柳
亭何限事年年迴首向春風

滌字用霖及景福進士第

王碩

三鄉詩云無姓無名越女濱芳詞空怨路傍人莫教才子偏惆悵宋玉東家是舊隣

李縞

三鄉詩云會稽王謝兩風流王子沉淪謝女愁歸思若隨文字在路傍空爲感千秋

陸貞洞

惆悵殘花怨暮春孤鸞舞鏡倍傷神清詞好箇干人事
疑是文姬第二身和三鄉詩也

貞洞吳郡人

高衢

三鄉詩云南北千山與萬山軒車誰不思鄉關獨留芳
翰悲前跡陌上恐傷桃李顏

張綺

三鄉詩云洛川依舊好風光蓮帳無因見女郎雲雨散

來音信斷此生遺恨寄三鄉

韋永

三鄉詩云來時歡喜去時哀家國迢迢向越臺待寫百年幽思盡故宮流水莫相催

永唐末爲鄴令

薛昭緯

華州勝昭緯寄諸門生詩曰時君過聽委平衡粉署華燈到曉明開卷固難窺浩汗執衡空欲慕公平機雲筆

舌臨文健沈宋章篇發詠清自笑觀光輝

自此闕

昭緯以侍郎掌貢舉試未明求衣賦王贊圖爲榜首薛
保遜大中朝尤肆輕佻侵侮諸叔自起居舍人貶洗馬
而卒昭緯其子也頗有父風嘗任祠部外郎時李系任
小儀王堯任小賓正旦立仗班退昭緯吟曰左金烏而
右玉兔天子旌旂堯遽請下句昭緯應聲曰上李系而下
王堯小人行綴天復中自臺丞累貶碭州司馬中書舍人
顏堯當制略曰陵轢諸父代嗣其凶薛存誠之子廷老廷

老之子保遜保遜之子昭緯為乾寧禮部侍郎性輕率
坐事貶碭州刺史

鄭合敬

合敬及第後宿平康里詩曰春來無處不閑行楚閨相

看別有情好是五更殘酒醒時時聞喚狀頭聲

楚閨
妓也

合敬乾符三年登上第終諫議大夫

許晝

許晝者睢陽人天復四年大駕東幸駐蹕甘棠晝於此

及第梁太祖長子大卿者常與畫屬和畫以卿爲與主
隨駕至洛携同年醉梁祖私第因折其牡丹主吏馳報
梁祖大卿竊知之先遣行畫行遂亡命河北閩人黃遇
嘗宰滑州衛南與畫聲跡不踈光化三年求選京師遇
謗畫嘗咎背矣畫卞急時內翰吳融侍郎西銓獨孤損
侍郎皆畫知己一旦畫造二君子自辨因袒而視之二
公掩袂而入畫遇其年俱落

畫中秋月云應是蟾宮別有情每逢秋半倍澄清清光

不向此中見白髮爭教何處生閑地占將真可惜幽窻
分得始爲明殷勤好長年來桂莫遣平人道不平

程賀

賀有君山詩時號程君山詩云曾遊方外見麻姑說道
君山自古無云是崑崙山頂石海風飄落洞庭湖崔亞
典眉州賀爲廳僕崔見其風味不常問曰爾讀書乎曰
薄涉藝文崔指一物令詠之雅有意旨因令歸選獎稱
於諸公間凡二十五舉及第時中和二年也入京則館

傅陵之第亞卒賀服纒三年

裴鉶

乾符五年鉶以御史大夫爲成都節度副使題石室詩
曰文翁石室有儀形庠序千秋播德馨古柏尚留今日
翠高岷猶藹舊時青人心未肯拋羶蟻弟子依前學聚
螢更歎沱江無限水爭流祇願到滄溟

時高駢爲使時亂矣故鉶詩有願到滄溟之句有微旨
也鉶作傳奇行於世

張孜

懿僖之代有京兆張孜者耽酒如狂與李山甫善有雪
詩云長安大雪天馬雀難相覓其中豪貴家搗椒泥四
壁到處爇紅爐周迴下羅幃暖手調金絲蘸甲斟瓊液
醉唱玉塵飛困融香汗滴豈知飢寒人腳手生皴劈

僖宗在蜀孜有傷時之作其間云着牙賣朱紫斷錢賒
舉選帝還京相府遣人捕之孜易姓越淮而遯

世傳孜夢李白歌有華山秀作英雄骨黃河瀉出縱橫

才又云夢破青霄春煙霞無去塵若誇郭璞五色筆江淹却是尋常人

顧雲

雲字垂象池州饒賈之子也風韻詳整與杜荀鶴殷文圭友善同肄業九華咸通中登第爲高駢淮南從事師度之亂退居雪川杜門著書宰相杜某奏雲與盧知猷陸希聲錢翊馮渥司空圖等分修宣懿德三朝實錄皆一時之選也書成加虞部外郎乾寧初卒有文號鳳策

聯華編藁昭亭雜筆

雲在淮南李昭象以學仙詞寄之云記得初傳九轉方
碧雲峯下祝虛皇丹砂未熟心徒切白日難留鬢欲蒼
無路洞天尋穆滿有時人世羨劉郎仙人思重何由報
焚盡星壇五夜香蓋招隱之義也

雲大順中制同羊昭業等十人修史雲至江淮遇高逢
休諫議時劉子長爲僕射其弟崇望復在中書雲叩逢
休希致先容逢休許之久矣雲臨岐請書授之一函甚

草創雲微有感潛啓閔之凡一幅並不言雲但曰羊昭
業等擬將一尺三寸汗脚踏他燒殘龍尾道懿宗皇帝
雖薄德不任被前件人羅織執大政者亦太悠悠雲歎
而已

雲詠柳云閑花野草摠爭新眉皺絃乾獨不勻乞與東
風殘氣力莫教虛度一年春

雲爲虞部郎中高駢淮南從事駢章疏不恭皆雲之辭
也雲著述目爲鳳策聯華雲初下第鄭谷有詩勉之云

鳳策聯華是國華春來偶爲上仙槎鄉連南渡思菰米
淚滴東風避杏花吟聒暮鶯歸廟院睡消遲日寄僧家
一般情緒應相信門靜深樹影斜

李昭象

字化文池州刺史方玄之子父卒因家焉懿宗末年以
文干相國路公崑問其年曰十有七矣崑年尚少尤器
重之薦於朝將召試會崑貶遂還秋浦移居九華與張
喬顧雲輩爲方外友龍紀中楊行密奔宣州以書招之

不從題顧正字谿居云高敞吟軒近釣灣塵中來似出
人間若教明月休生桂應得危時共掩關春酒夜棊難
放客短籬疎竹不遮山莫誇恬淡勝榮祿鴈引行高未
許閑寄獻山中顧公員外云抽却朝簪著釣簑近來聲
迹轉巍峩祥麟避網雖山野丹鳳銜書即薜蘿乍隱文
章情更逸久閑經濟術翻多深慙未副吹噓力竟困風
埃爭奈何

山中寄崔諫議云半生援鳥共山居吟月吟風兩鬢疎

新句未嘗忘教化上才爭忍不吹噓
全家欲去干戈後大國中興禮樂初
從此升騰休說命祇希公道數封書
喜杜荀鶴及第云深巖貧復病
膀到見君名貧病渾如失山川
頻覺清一春新酒興四海舊詩聲
日使能吟者西來步步輕

赴舉出山留寄山居鄭參軍云還如費冠卿
向此振高名肯羨魚鬚美長誇鶴氅輕
理琴寒指倦試藥黑髭生時泰難雲卧
隨省急詔行

唐詩紀事卷六十七

欽定四庫全書

唐詩紀事卷六十八

宋計敏夫撰

湯文圭

唐彥謙

裴澈

盧携

韋莊

吳融

公乘億

羅鄴

羅衮

湯文圭

本殷文圭

文圭池州人居九華小字桂郎苦學所用墨池底爲之
穴舉進士中途遇一叟曰眉綠拳文入口神仙狀也如

學道當沖虛爲儒當大有名於天下唐末詞場請託公
行文圭與游恭獨步場屋乾寧中帝幸三峯文圭携梁
王表薦及第仍列榜中尋爲裴樞宣諭判官至大梁朱
全忠表薦之既而由汴宋馳歸全忠大怒遣吏捕之不
及矣自是屢言措大率皆負心每以文圭爲證白馬之
禍蓋自此也文圭事楊行密終左千牛衛將軍子崇義
自江南歸朝改姓湯名悅

九華賀雨吟云陶公焦思念生靈變旱爲豐合杳冥雷

劈老松疑虎怒雨衝陰洞覺龍腥萬畦香稻蓬慈綠九
朶奇峰撲亞青吟賀西成饒旅興散絲飛灑滿長亭

贈池州張太守云神珠無類玉無瑕七葉簪貂漢相家
陣面奔星破犀象筆頭飛電躍龍蛇絳帷夜坐窮三史
紅旆春行到九華只怕他人留不住別遷征鎮擁高牙
和友人送衡尚書赴池陽副車云淮王上將例分憂玉
帳參承半列侯次第選材如創厦別離排宴向藏舟鷗
鵬變化知難測龍蠖昇沉各有由躑躅行牽金鉞重嬋

娟立唱翠娥愁築頭勲業諧三陣滿腹詩書究九流金
海珠韜乘月讀肉芝牙茗撥雲收赤鱗旆卷鷗汀晚青
雀船橫鴈陣秋十字細波澄鏡面九華殘雪露峰頭醉
沉北海千罇酒吟上南荆百尺樓況是昭明食魚郡不

妨閑擲釣璜鉤

文圭賀池陽太守正命云衆口
聲先誇漢將築頭勲業佐淮王

中秋自宛陵寄池陽太守云出山三見月如眉蝶夢終
宵遶戟枝旅客思歸鴻去日賢侯行化子來時郡樓遐
想劉琨嘯相閣方窺謝傳基按部況聞秋稼熟馬前迎

拜羨并兒

次韻九華杜先輩重陽寄投宛陵丞相云日下飛聲徹
不毛酒醒時得廣離騷先生鬢爲吟詩白上相心因治
國勞千乘信迴魚檣重九華秋迴鳳巢高強酬小謝重
陽句沙恨無金盡日淘

寄賀杜荀鶴及第云一戰平疇五字勞晝歸鄉去錦爲
袍大鵬出海翎猶濕駿馬辭天氣正豪九子舊山增秀
絕二南新格變風騷由來稽古符公道平地丹梯甲乙

高

文圭杜荀鶴楊夔康輶夏侯淑王希羽等皆爲淮南將
田頔上客文圭有美名不應朱全忠錢鏐之辟頔置田
宅迎其母以甥事之故文圭爲盡力夔知頔不足亢楊
行密著溺賦以戒頔不用果敗文圭受薦於全忠復擬
飾非投啓於公卿略曰於菟獵食非求尺璧之珍鷄鷄
避風不望洪鐘之樂既登第即南歸俄爲多言者所發
全忠捕之則不及矣

或云文主應舉嘗經大澤中驟雨震電衆駭躓獨安詳
如不聞雨定傍人見其兩耳中鬼神以泥封之後爲內
翰曾草司空李德誠麻潤毫久不至爲詩督之云紫殿
西頭月欲斜曾草臨淮上相麻潤筆已曾經奏謝更將
章句問張華時論少之

唐彥謙

唐儉裔孫憲宗時終中書舍人次子持持子彥謙字茂
業歷慈絳澧三州刺史自號鹿同先生陶穀之祖也穀

避晉祖諱改姓陶後遂不易識者非之

中秋翫月云一夜高樓萬景竒
碧天無際水無涯只留
皎月當層漢並送浮雲出
四維霧靜不容玄豹隱
水生唯恐夏蟲疑坐來離
思憂將曉爭得嫦娥子
細知

上已寄韓八云上已接寒食
鶯花寥落晨微微
潑火雨
草草踏青人涼似三秋
景清無九陌塵與余同
病者對此合傷神

又云露白風清夜向晨
小星垂佩月埋輪
絳河浪淺休

相隔滄海波深尚作塵天外鳳凰何寂寞世間烏鵲謾
辛勤倚欄殿北斜樓上多少通宵不寐人

八月十六日夜月云斷腸佳賞固難期昨夜消魂更不
疑丹桂影空蟬有露綠槐陰在鵲無枝懶將吟咏聊惆
悵早是踈頑耐別離堪恨賈生曾慟哭不緣清景爲憂
時過長陵詩云耳聞明主提三尺眼見愚民盜一抔千
古腐儒騎瘦馬灞陵斜日重回頭

又題蒲津河亭云煙橫博望乘槎水月上文王避雨陵

最善用事

詠柳云惹絆風光別有情世間誰敢鬪輕盈楚王江畔
無端種餓損宮腰學不成

彥謙學義山爲詩

裴澈

澈登咸通進士第後爲相初左拾遺孟昌圖在蜀上疏
極諫僖宗田令攷惡之沉諸驀頤江澈以詩弔曰一章
何罪死何名投水惟君與屈平從此蜀江煙月夜杜

鵲應作兩般聲

盧携

嘗題司空圖壁云姓氏司空貴官班御史卑老夫如且
在不用歎屯奇

携字子升乾符中爲相巢寇表求天平節度不與欲倚
高駢立功巢遂入關携仰藥死

韋莊

立春云青帝東來日馭遲暖煙輕逐曉風吹蜀袍公子

蹲前覺錦帳佳人夢裏知雪浦乍開紅菜甲綵幡新剪
綠楊枝殷勤欲獻宜春曲題向花牋帖繡楣

長安清明云早是傷春夢雨天可堪芳草更芊芊內官
初賜清明火上相閑分白打錢紫陌亂嘶紅叱撥綠楊
高映盡鞦韆遊人記得承平事暗喜風光似昔年

感懷詩云長年方悟少年非人道新詩勝舊詩十畝野
塘留客釣一軒春雨對僧碁花間醉任黃鶯語亭上吟
從白鷺窺大道不將爐冶去有心重築太平基或謂此

詩包括生成果爲台輔莊應舉時遇巢冠犯闕著秦婦
吟云內庫燒爲錦繡灰天街踏盡公卿骨公卿多垂訝
莊乃諱之時號秦婦吟秀才又有帝子夢魂煙水闊謝
公詩思碧雲低最爲警策至若閑卧詩云誰知閑卧意
非病亦非眠又手從雕扇落頭任漉巾偏識者知其不
祥後誦子美詩白沙翠竹江村暮相送柴門月色新吟
諷不輟是歲卒於花林坊葬於白沙

莊字端已杜陵人見素之後曾祖少微宣宗中書舍人

莊踈曠不拘小節李詢爲兩川宣諭和協使辟爲判官
以中原多故潛欲依王建建辟爲掌書記尋召爲起居
舍人建表留之後相建爲僞平章事

莊爲王建管記時一縣宰乘時擾民莊爲建草牒云正
當凋瘵之秋好安凋瘵勿使瘡痍之後復作瘡痍時以
爲口實

莊集詩人一百五十人得詩三百章爲又元集序云此
蓋詩中鼓吹名下笙簧擊鳧氏之鐘霜清日觀淬雷公

之劍影動星津雲間分合壁之光海上運摩天之翅奪造化而雲雷噴湧沒鬼神而風雨奔馳但忍其食馬留肝徒云染指豈慮其烹魚去乙或致傷鱗

吳融

壬戌歲闋鄉卜居云六載抽毫侍禁闈不堪多病決然歸五陵年少如相問阿對泉頭一布衣

阿對是伯起家嘗引泉灌蔬其

泉至今

尚在

華清宮云中原無鹿海無波鳳輦鑾旂出幸多今日故

鄉歸寂寞太平功業在山河

四郊飛雪暗雲端唯此宮中落旋乾
綠樹碧簷相掩映無人知道外邊寒

漁陽烽火照函關玉輦忽忽下此山
一曲羽衣聽不盡至今遺恨水潺潺

關東獻劉員外云昨夜星辰動仙郎
近漢闕玳筵吟雪罷錦帳押春還
已到青雲上應棲絳圃間
臨邛有辭賦一爲奏天顏

融字子華越州人昭宗時爲翰林學士卒于官

李巨川爲華帥韓建掌書記昭宗至華清宮賜建御容
一軸時巨川草謝表以示融其中有彤雲似蓋以長隨
紫氣臨闕而不度融吟味不已因草篇與巨川對壘略
曰霧開五里克諧披覩之心掌拔一峯兼助捧持之力
松江晚泊云樹遠天疑盡江奔地欲隨孤帆落何處殘
日更新離客是淒涼本情爲繫滯枝寸腸無計免應只
楚猿知紅樹云一聲南鴈已先紅撼撼淒淒葉葉同此

是孤根非暖地莫驚他木耐秋風燒煙散去陰全薄明
月臨來影半空長憶洞庭千萬樹昭山橫浦夕陽中

公乘億

高湜咸通末爲禮部侍郎士多繇權要干請湜曰吾決
以至公取之得譴固吾分乃取億許棠聶夷中皆有文
名

億字壽仙魏人與李山甫皆爲魏博樂彥禎幕府羅隱
寄詩於易定云謝舞仍宮柳高竒世少雙侍中生不到

園令死須降班秩通烏府樽壘奉碧幢昭王有餘烈試
爲禱迷邦

億郎官上應列宿詩云北極佇文昌南宮曉拜郎紫泥
乘帝澤銀印佩天光緯結三台側鈎連四輔傍佐商依
傳說仕漢笑馮唐委佩搖秋色莪冠帶晚霜自然符列
象千古耀崑廊

秋菊有佳色云陶令籬邊菊秋來色轉佳翠攢千片葉
金剪一枝花蘂逐蜂鬚亂英隨蝶翅斜帶香飄綠綺和

酒上烏紗散漫搖霜彩嬌妍漏日華芳菲彭澤見更稱
在誰家

臨江遲來客云江上晚沉沉煙波一望深向來殊未至
何處擬相尋柳結重重眼萍翻寸寸心暮山期共眺寒
渚待同臨北去魚無信南飛鴈絕音思君不可見使我
獨愁吟

億以詞賦著名咸通十三年別家十餘年矣嘗大病鄉
人傳以死其妻自河北迎喪會億送客馬上見婦人麗

縑類其妻也睇睨不已妻亦如之詰之則是也相持而哭路人異之後旬日登第億嘗有詩云十上十年皆落第一家一半已成塵可知其屈矣

羅鄴

費拾遺書堂云滿袖歸來天桂香紫泥重降舊書堂自憐韋帶同巢許不駕蒲輪佐禹湯恠石盡涵千古秀奇花多吐四時芳何人更肯追高躅唯有樵童戲蘚牀雲詩云紛紛靄靄遍江湖得路爲霖豈合無莫使悠颺

祇如此帝鄉還更暖蒼梧

歲仗云玉帛朝天萬國來鷄人唱曉五門開春排北極
迎仙仗日捧南山入壽杯歌舜薰風鏘玉佩祝堯嘉氣
靄樓臺可憐四海車書混重見蕭曹佐漢才

牡丹云落盡春紅始見花花時比屋事豪奢買栽池館
恐無地看到子孫能幾家門倚長衢攢繡輶幄籠輕日
護香霞歌鐘到此爭懽賞豈信流年鬢有華

賞春云芳草和煙暖更青閑門要路一時生年年點檢

人間事唯有春風不世情

公子行云彫鞍玉勒照花明
過後香風特地生
半醉五侯門裏出月高猶在禁街行

鄴餘杭人父則爲鹽鐵小吏有二子俱以文學上進鄴尤長七言詩時宗人隱亦以律韻著稱然隱才雄而踈鄴才清而緻咸通中崔安潛侍郎廉問江西志在弓旌竟爲幕吏所沮既而俯就督郵因茲舉事無成而卒

羅衮


清明登奉先城樓云年來年去只艱危春半堯山草尚
衰四海清平耆舊見五陵寒食小臣悲煙銷井邑隈樓
檻雪滿川原泥酒卮拭盡賈生無限淚一行歸鴈遠參
差

清明赤水寺居云榆火輕煙處處新旋從閑望到諸隣
浮生浮世祇多事野水野花娛病身濁酒不禁雲外景
碧峰猶冷寺前春簔衣毳衲誠吾黨自結村園一社貧
羅隱梁開平中召拜夕郎不起哀以小天倖大秋姚公

使兩浙以詩贈隱曰平日時風好涕流讒書雖盛一名
休寰區歎屈瞻天問夷貊聞詩過海求向夕便思青瑣
拜近年尋伴赤松遊何當世祖從人望早以公台命卓
侯隱荅曰崑崙水色九般流飲即神仙憇即休敢恨守
株曾失意始知緣木更難求鵠原謾欲均餘力鶴髮那
堪問舊遊遙望北辰當上國羨君歸棹五諸侯

昭宗誅韓全誨等袞時爲左拾遺上言劉蕡當大和時
宦官始熾因直言策請奪爵土復掃除之役遂羅譴逐

死異土六十餘年正人端士切齒飲泣使蕢策蚤用則
杜漸防萌逆節可消帝感悟贈蕢左諫議大夫



唐詩紀事卷六十八

欽定四庫全書

集部

唐詩紀事卷

六十九至
七十一

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚臧

謄錄監生臣劉紳

欽定四庫全書

唐詩紀事卷六十九

宋 計敏夫 撰

羅虬

羅隱 劉贊

陸衣

羅虬

比紅兒詩并序云比紅者為雕陰官妓杜紅兒作也美
貌年少機智慧悟不與羣輩妓女等余知紅者廼擇古
之美色灼然于史傳三數十輩優劣於章句間遂題比
紅詩

姓氏看侵尺五天芳菲占斷百花鮮
馬嵬好笑當時事
虛賺明皇幸蜀川

金谷園中花正繁墜樓從道感深恩
齊奴恰是來東市

不為紅兒死更冤

石崇生青州故小名齊奴

陷却平陽為小憐周師百萬戰長川
更教乞與紅兒貌

舉國山川不直錢

小憐比齊後主馮淑妃名

一曲都緣張麗華六宮齊唱後庭花
若教比並紅兒貌

枉破當時國與家

樂營門外柳如陰中有佳人畫閣深若是五陵公子見
買時應不啻千金

青絲高綰石榴裙腸斷當筵酒半醺置向漢宮圖畫裏
入朝應不啻昭君

斜凭欄杆醉態新歛眸微眄不勝春當時若遇東昏主
金葉蓮花是此人

匝匝千山與萬山碧桃花下景長閑神仙得似紅兒貌
應免劉郎憶世間

越山重疊越溪斜西子休憐解浣紗得似紅兒今日貌
肯教將去與夫差

詔下人間覓好花月眉雲髻選人家紅兒若向當時見
繫臂先封第一紗

鋒鏑縱橫不敢看淚垂玉筋正沈瀾應緣近似紅兒貌
始得深宮奉五官

金縷濃薰百和香臉紅眉黛入時粧當時便向喬家見
未敢將心在窈娘

喬知之
故事

通宵甲帳散香塵漢帝精誠禮百神若見紅兒醉中態
也應休憶李夫人

拔得芙蓉出水新魏家公子信才人若教瞥見紅兒貌
不肯留情賦洛神

芳姿不合並常人雲在遙天玉在塵因事愛思荀奉倩
一生閑坐枉傷神

筆底如風思湧泉賦中休謾說嬋娟紅兒若在東家住
不得登牆爾許年

一抹濃紅傍臉斜粧成不語獨攀花當時若是逢韓壽
未必埋蹤在賈家

樹裏西風日半沉地無人跡轉傷心阿嬌得似紅兒貌
不費長門買賦金

五雲高捧紫金堂花下投壺侍玉皇從道世人不識
也應知有杜蘭香

戲水源頭指舊蹤當時一笑也難逢紅兒若為迴桃臉
豈比連催舉五烽

號國夫人照夜璣若為求得與紅兒醉和香態濃春睡
一樹繁花偃繡幃

知有持盈玉葉冠剪雲裁月照人寒若使紅兒風貌戴
直似瑤池會上看

明媚何曾讓玉環破瓜年幾百花顏若教貌向南朝見
定却梅粧似等閑

世事悠悠未足稱肯將閑事更爭能自從命向紅兒斷
不欲留心在裂繒

自隱新從夢裏來，嶺雲微步下陽臺。
含情一向春風笑，羞殺凡花盡不開。

捨却青娥換玉鞍，古來公子苦無端。
莫言一匹追風馬，天驥牽來也不看。

檻外花低瑞露濃，夢魂驚覺暈春容。
憑君細看紅兒貌，最稱嚴粧待曉鐘。

薄羅輕剪越溪紋，鷗翅低從兩鬢分。
料得相如偷見面，不應琴裏挑文君。

南國東鄰各一時後來唯有杜紅兒
若教楚國宮人見羞把腰身並柳枝

照耀金釵簇膩鬟見時直向畫屏間
黃姑阿母能判剖十斛明珠也是閑

輕小休誇似燕身生來占斷紫宮春
漢皇若遇紅兒貌掌上無因着別人

鸚鵡娥如裛露紅鏡前眉樣自深宮
稍教得似紅兒貌不嫁南朝沈侍中

擬將心地學安禪，爭奈紅兒笑靨圓。
何物把來堪比並，野塘初綻一枝蓮。

浸草漂花遶檻香，最憐穿度樂營牆。
慙慙留滯緣何事，曾照紅兒一面粧。

雕陰舊俗騁嬋娟，有箇紅兒賽洛川。
常笑世人語虛誕，今朝自見火中蓮。

渡口諸儂樂未休，竟陵西望路悠悠。
石城有箇紅兒貌，兩槳無因迎莫愁。

誰向深山識大仙
勸人山上引春泉
定知不及紅兒貌

枉却工夫溉玉田

搜神記楊
雍伯故事

傾國傾城總絕倫
紅兒花下認真身
十年東北看燕趙
眼冷何曾見一人

今時自是不諳知
前代由來豈見遺
一笑陽城人便惑
何堪教見杜紅兒

京口喧喧百萬人
競傳河鼓謝星津
柰花似雪簪雲髻
今日天容是後身

青史書時未是真可能纖手却狂秦再三為謝齊皇后
要解連環別與人

繡帳鴛鴦對刺紋博山微暖麝微曛詩成若有紅兒貌
悔道當時月墜雲

粧成渾欲認前朝金鳳釵雙逐步搖未必慕容宮裏伴
舞風歌月勝纖腰

琥珀釵成恩正深玉兒妖惑蕩君心莫教回首看粧面
始覺曾虛擲萬金

自有閑花一面春
臉檀眉黛一時新
慙慙為報梁家婦

休把啼粧賺後人

梁冀故事

輕梳小髻號慵來
巧中君心不用媒
可得紅兒拋醉眼
漢皇恩澤一時迴

千里長江旦暮潮
吳都風俗尚纖腰
周郎若見紅兒貌
料得無心念小喬

月落潛奔暗解攜
本心誰道獨單棲
還緣交甫非良偶
不肯終身作羿妻

漢皇曾識許飛瓊
寫向人間作畫屏
昨日紅兒花下見
大都相似更娉婷

魏帝休誇薛夜來
霧綃雲縠稱身裁
紅兒笑發君知否
倚檻繁花帶露開

曉月雕梁燕語頻
見花難可比他人
年年媚景歸何處
長作紅兒面上春

逗玉濺盆冬殿開
邀恩光賜夜明苔
紅兒若是三千數
多少芳心似死灰

畫簾垂地紫金床
暗引羊車駐七香
若見紅兒此中住
不勞鹽篠洒宮廊

蘇小空勻一面粧
便留名字在錢塘
藏鴉門外諸年少
不識紅兒未是狂

一首長歌萬恨來
惹愁漂泊水難迴
崔徽有底多頭面
費得微之爾許才

昔年黃閣識奇章
愛說真珠似窈娘
若見紅兒深夜態
便應休說繡衣裳

鳳拆鶯離恨轉深此生難負百年心紅兒若向隋朝見
破鏡無因更重尋

行綰穠雲立暗軒我來猶愛不成冤當時若見紅兒貌
未必形相有此言

總似紅兒媚態新莫論千度笑爭春任伊孫武心如鐵
不辦軍前殺此人

暖塘爭赴盪舟期行唱菱歌著艷詞為問東山謝丞相
可能諸妓勝紅兒

吳興皇后欲辭家澤國重臺展曙霞今日紅兒貌傾國
恐須真宰別開花

陌上行人歌黍離三千門客欲何之若教粗及紅兒貌
爭敢樓前斬愛姬

休話如皋一笑時金鵲中臆錦離披陋容枉把彫弓射
射盡春禽未展眉

長恨西風送早秋低眉深恨嫁牽牛若同人世長相對
爭作夫妻得到頭

謝娘休謾逞風姿未必娉婷勝柳枝聞道只應嘲落絮
何曾得似杜紅兒

總傳桃葉渡江時只為王家一首詩今日紅兒自堪唱
不須枉唱舊來詞

巫山洛浦本無情總為佳人便得名今日雕陰有神艷
後來公子莫相輕

幾拋雲髻恨金墉淚洗花顏百戰中應有紅兒些子貌
却言皇后長深宮

倚檻還應有所思
半開東閣見嬌姿
可中得似紅兒貌
若遇韓朋好殺伊

曉向粧窓與畫眉
鏡中長欲助嬌姿
若教得似紅兒貌
走馬章臺任道遲

鍊得霜華助翠鈿
相期朝謁玉皇前
依稀有似紅兒貌
方得吹簫引上天

重門深掩幾枝花
未勝紅兒莫大誇
王相不能探物理
可能虛上短轅車

前代休憐事可奇後來還出有光輝爭如晝卧紗窗裏
不有神人覆玉衣

化羽嘗聞赴九天只疑塵世是虛傳自從一見紅兒貌
始信人間有謫仙

從道長安小市東巧將花貌占春風紅兒若是同時見
未必伊先入紫宮

人間難免是深情命斷紅兒向此生不似前時李丞相
枉拋才力為鶯鶯

鳳舞香飄繡幕風暖穿馳道百花中還緣有似紅兒貌
始道迎將入漢宮

休道將軍出世才盡驅諸妓下歌臺都緣沒箇紅兒貌
致使輕教後閣開

馮媛須知住漢宮將身只是解當熊不聞有貌傾人國
爭得今朝更似紅

能將一笑使人迷花艷何須上大堤踈屬便同巫峽路
洛川真是武陵溪

辭輦當時意可知寵深還恐寵先衰若教得似紅兒貌
占却君恩自不疑

三吳時俗重風光未見紅兒一面粧好寫妖嬈與教看
便應休更話真娘

波平楚澤浸星辰臺上君王宴早春畢竟章華會中客
冠纓虛絕為何人

紅兒不向漢宮生便使雙成謾得名疑是麻姑惱塵世
暫教微步下層城

天碧輕紗只六銖宛如含露透肌膚便教漢曲爭明媚
應沒心情更弄珠

共嗟含恨向衡陽方寸花牋寄沈郎不似紅兒些子貌
當時爭得少年狂

淺色桃花亞短牆不因風送也聞香凝情盡日君知否
還似紅兒淡薄粧

火色櫻桃摘得初仙宮只有世間無凝情盡日君知否
真似紅兒口上朱

宿雨初晴春日長入簾花氣靜難忘凝情盡日君知否
真似紅兒舞袖香

初月纖纖映碧池池波不動獨看時凝情盡日君知否
真似紅兒罷舞眉

濃艷濃香雲壓枝裊煙和露曉風吹紅兒被掩粧成後
含笑無人獨立時

樓上嬌歌裊夜霜近來休數踏歌娘紅兒謾唱伊州遍
認取輕敲玉韻長

金粟粧成扼臂環舞腰輕薄瑞雲間紅兒生在開元末
羞殺新豐謝阿蠻

君看紅兒學醉粧誇裁宮纈研裙長誰能更把閑心力
比並當時武媚娘

梳子同心裛露垂折來深恐没人知花前醉客頻相問
不贈紅兒贈阿誰

雲間翡翠一雙飛水上鴛鴦不暫離寫向人間百般態
與君題作比紅詩

舊恨長懷不語中幾回偷泣向春風還緣不及紅兒貌
却得生教入楚宮

一舸春深指鄂君好風從度水成紋越人若見紅兒面
繡被應羞徹夜薰

花落塵中玉墮泥香魂應上窈娘堤欲知此恨無窮處
長倩城烏夜夜啼

虬詞藻富瞻與宗人隱鄴齊名咸通乾符中時號三羅
廣明庚子亂後去從鄜州李孝恭籍中有杜紅兒者歌

常為副戎屬意副戎聘鄰道虬請紅兒歌而贈絳孝恭
以副戎所盼不令受之虬怒拂衣而起詰旦手刃紅兒
既而思之乃作絕句百篇以追其冤號比紅盛行於時

羅隱 劉贊

字昭諫餘杭人隱池之梅根浦自號江東生為唐相鄭
畋李蔚所知畋女覽隱詩諷誦不已畋疑有慕才意貌
寢陋女一日簾窺之自此絕不詠其詩廣明中池守竇
滔營墅居之光啓中錢鏐辟為從事節度判官副使梁

祖以諫議名不行開平中魏博羅紹威推為叔父表授

給事中年八十餘終餘杭

有子塞翁

隱虬鄴共塲屋謂之三羅

隱與桐廬章魯封齊名錢鏐初起以魯封為表奏孔目
官不就執之後以隱為錢塘令懼而受命因宴獻口號
曰一箇禰衡容不得思量黃祖謾英雄鏐自是厚禮之
僧貫休懷二子詩云二子依公子鷄鳴狗盜徒青雲十
上苦白髮一莖無風滿潮聲惡天空角韻孤別離千萬

里何以慰榮枯隱謝裴廷韓詩卷云澤國家人唯粧半
面營邱辯士何用空籠其浮薄如此隱受知於令狐綯
卒無成有詩哭綯云深恩無以報底事是柴荆

鄴都王紹威學隱為詩自號其文為偷江東集青州王
師範遣使齎禮幣求一篇隱以詩寄之曰盛業傳家有
寶刀況聞餘力更揮毫腰間印綬黃金貴卷內文章白
雪高宴罷佳賓吟鳳藻獵回諸將問龍韜登壇甲子纔
三十猶擬回頭奪錦標王得詩大喜昭宗欲以甲科處

之有大臣奏曰隱雖有才然多輕易明皇聖德猶橫遭
譏將相臣僚豈能免乎凌鑠帝問譏謗之詞對曰隱有
華清詩曰樓殿層層佳氣多開元時節好笙歌也知道
德勝堯舜爭奈楊妃解笑何其事遂寢令狐湍趙公綯
之子登進士隱以詩賀之趙公謂湍曰吾不喜汝及第
喜汝得羅公一篇耳隱在浙幕沈山松得新榜示隱題
其末曰黃土原邊狡兔肥犬如流電馬如飛灞陵老將
無功業猶憶當時夜獵歸

鍾陵妓雲英隱舊見之一日譏隱猶未第隱嘲之曰鍾陵醉別十餘春重見雲英掌上身我未成名君未嫁可能俱是不如人

顧雲依淮南高駢隱譏之夏飲於海風亭雲曰青蠅被扇扇離坐隱遽曰白澤遭釘釘在門

隱老不遇有歸五湖詩云江東日暖花又開江東行客思悠哉高陽酒徒半凋落終南山色空崔嵬聖代也知無棄物侯門未必用非才一舸明月一竿竹家住五湖

歸去來

進士劉贊贈隱詩曰人皆言子屈獨我謂君非明主既難謁青山何不歸年虛侵雪鬢塵枉污麻衣自古逃名者至今名豈微

牡丹云似共東君別有因絳羅高卷不勝春若教解語應傾國任是無情也動人芍藥與君為近侍芙蓉何處避芳塵可憐韓令功成後辜負穠華過此身

籌筆驛云拋擲南陽為主憂北征東討盡良籌時來天

地皆同力運去英雄不自由千里山河輕孺子兩朝冠
劍恨譙周惟餘崑下多情水猶解年年傍驛流魏城逢
故人云一年兩度錦江遊前值東風後值秋芳草有情
皆礙馬好雲無處不遮樓山將別恨和心斷水帶離聲
入夢流今日因君試回首澹煙喬木隔綿州

中秋夜不見月云陰雲薄暮上空虛此夕清光已破除
只恐異時開霽後玉輪依舊養蟾蜍

蜂云不論平地與山尖無限風光盡被沾採得百花成

蜜後不知辛苦為誰甜

杜荀鶴錢塘別隱詩云故國看看遠前程計在誰五更
吹角候一葉渡江時吾道天寧喪人情日可疑西陵向
西望雙淚為君垂

鼉江常有二氣亘于江終夜不滅隱及杜建徽生氣不
復見議者以為文武秀氣

江南李氏嘗遣使聘越越人問見羅給事否使人曰不
識亦不聞名越人云四海聞有羅江東何拙之甚使人

曰為金榜上無名所以不知

陸扆

扆詩有今秋已約天台月之句或云扆昭宗末舉進士及第六月榜出盛暑同舍戲曰造榜天也觀扆此詩豈幸倉卒苟科第者

唐詩紀事卷六十九